

Hir wenten eczliche, das die vestunge vsze were, extra de offic(iis) judicis delegati ca. gratum, e. t. relatum, et c. licet undique, extra de officio delegati c. nemini. Dis vornemen sie also: Noch deme, das der tot ist, der desze vestunge gebot, das denne ouch sin gebot, das was die vestunge, tot sie. Des ist nicht. Wenne in deme decretale stet: Ab eyner eynen richter behalden hette, sturbe der richter ader der cleger ader der antwerter, ee die clage begunst wurde, das heisset re integra, so were die behaldunge tot. Hir was der sache begunst, vnd was bie ienes lebene vul gerichtet. Dar vmbe en stirbet die vestunge nicht, vnd dis recht ist weder das decretal nicht.

Des sal syn nachkomeling geczug syn. Dis ist offenbar weder das recht, das dar spricht, / [*1vb*] das nymand geczug moge sin von sogethanen worten, extra de eleccione c. per inquisitionem. <Is^e ist ouch^e> weder die recht, die sagen, das geczugunge solle sin von sende vnd von horende, extra de testibus c. preterea.

Dis entscheide alsus. Vnwissentliches dinges en gloubet man nicht, es en werde beczuget mit den, die es sagen vnd horten, extra de testibus c. preterea, e. t. c. tantum, XXXII q. I c. dixit. Jst das den scheppen wissentlich, so gloubet man das deme richtere billichen, deme sie es gesait haben. Man mag ouch eczlich ding thun von ammechte, der man anders nicht thun mochte, XXXIII q. V c. de occidendis. Alsus geschiet dis von ammechte, das her alsus zcugen mag. Dar vmme ist es weder enander nicht.

[III 25 § 2] Bynnen margkte. Hir wil her entschuldigen vnd entscheiden wichbilderecht vnd lantrecht, vnd sait, das dar kein lantman ynne antworten dorffe, vnd wil, das der cleger deme antwertere sulle volgen vor synem richtere, ut C. de ordine cognitionis et de foro competentis l. iuris ordinem.

[III 25 § 3] Was buszen deme richtere geschiet. Es syn doch fumerleie sache, vmb die man vor eyne fremden richtere antworten mus.

Das erste ist, ab eyne man gut vnder deme richtere hette, vor deme eyne man clagen welde, ut C. ubi de criminibus agi oportet l. questiones, et III q. VI c. ubi.

Ader her bergete sich darynne. Das ist, ab her kouffschacz darynne hette, ff. de iudicijs l. I.

Das virde ist, ab her darynne claite, so mus her ouch darynne antworten, ff. de procuratoribus § pena.

e-e) Jsti zonoch *Hs*.